

ՋՐԻ ՈԳԻՆԵՐԻ ՏԻՊԱԲԱՆԱԿԱՆ ԵՒ ԳՈՐԾԱՌՈՒԹԱՅԻՆ ՔՆՆՈՒԹԻՒՆ

(ըստ հայ ժողովրդական գրոյցների)

ՅԱՍՄԻԿ ԳԱԼՍՏԵԱՆ (hasmikgalstyan1979@gmail.com)

ՆԵՐԱԾՈՒԹԻՒՆ

Հայ ստորին առասպելաբանության¹ մէջ մտնող չար ոգիների շարքում առանձնանում են ջրին առնչուող ոգիները, որոնք զուգահեռներ ունեն աշխարհի շատ ժողովուրդների հաւատալիքներում: Ոգիների այս խմբի մասին ժողովրդական գրոյցները քանակական առումով բաւականին քիչ են, թէեւ աշխարհագրորէն ունեն լայն ընդգրկում: ԺԹ. դարի կէսերից մինչեւ Ի. դարասկզբի գրաւոր աղբիւրներում առկայ գրոյցներում յիշատակուող ջրի ոգիների նախատիպերը տեսնում ենք *Աստուածաշնչում*, Ե. դարի հայ պատմիչների երկերում են.:

ՋՐԻ ՈԳԻՆԵՐԻ ԱՆՈՒԱՆՈՒՄՆԵՐԸ

Ըստ հայկական գրոյցների եւ ժողովրդական հաւատալիքների՝ փերինները, յաւերժահարսները, ջրանուշները, հրեղէն աղջիկները, ջրի աղջիկները, երկնքի աղջիկները, փերի ղզիները, հնարքներն ու ջրի պառանները ջրերի ու անտառների ոգիներ են եւ հիմնականում հանդէս են գալիս «**փերիներ**» ընդհանուր անուան տակ²: Ըստ Ստեփանոս Մալխասեանցի՝ **փերի** բառը փոխառուած է պահլաւերէն **parik** բառից, որ նշանակում է չար ոգի, սատանայի էգ: Սոգդիերէնում եւ պարսկերէնում՝ **parik**, **pari**, նշանակում է յաւերժահարս, աննման գեղեցկութեամբ բարի ոգի, փերի, իսկ զենդերէնում **parikān** կախարդ կինն է³:

¹ «Ստորին առասպելաբանութիւն» (lower mythology) եզրոյթն առաջին անգամ գիտական շրջանառութեան մէջ է դրել գերմանացի ազգագրագէտ, Կրիմ եղբայրների առասպելաբանական դպրոցի հետեւորդ Վիլիելմ Մանհարդտը: Նա համարում է, որ «վերին աստուածութիւնների շարքում գոյութիւն ունեն այլ առասպելաբանութեան կերպարներ, որոնք, առանց որեւէ հեգնանքի, անուանում է «ստորին», որտեղ գերակշռում են փերիներն ու ոգիները», Дж. Коккьяра, *История фольклористики в Европе (Բանագիտութեան պատմութիւնը Եւրոպայում)*, Մոսկուա, 1960, էջ 418-19:

² Ազգագրագէտ Էմմա Պետրոսեանի բանաւոր հաղորդմամբ՝ իր հայրը երեխաներին սաստել կամ վախեցրել է «ջրի պիզպիզ» կոչուող ոգու անունը տալով:

³ Ստ. Մալխասեանց, *Հայերէն բազմադրական բառարան, հրք. 4*, Հայկական ՍՍՌ պետական հրատ., Երեւան, 1944, էջ 83-84, 497:

Հայ առասպելաբանության մէջ եւ *Աստուածաշնչում*⁴ յիշատակում է նաեւ **յուշկապարիկը**⁵, որը իրանեան փոխառութիւն է՝ կազմուած «յուշկ» եւ «պարիկ» բառերից, եւ յունարէնից թարգմանաբար նշանակում է «իշացուլ»⁶: Հայր Ղեւոնդ Ալիշանը գրում է, որ ծովային հրէշների փոխաբերւմ երբեմն ասուել է նաեւ յուշկապարիկ եւ վկայակոչում է Փիլոնի գրուածքների մեկնիչին, ով պարիկների (Syrènes) երգը այսպէս է բացատրում. «*Յուշկապարիկն է, որ մինչեւ ի պորտն կնոջ պարկեր է, եւ անհնարին քաղցր ծայն ունի, եւ պարտէ զսողսն*»⁷: Մէկ ուրիշը գրում է «*Յուշկապարիկ՝ Համբարում է. կէս անձինն կնոջ է եւ կէսն թռչնոց, եւ յոյժ քաղցրածայն է, եւ ի ծովու բնակէ. ոմանք ասեն՝ հաւ է քաղցրածայն անապատասէր, կամ դեւ մարդապետիլ. ոմանք Յուշկապար, պորտի վերն մարդոյ է, անդի վայրն՝ իշոյ*»⁸: Մեջբերելով Եպիփանոս բարոյախօսին՝ ասում է. «*Վասն Յուշկապարկաց, թէ մահաբերք են, եւ ի ծովու են, եւ երգեն երգս քաղցրածայնս, եւ կերպարանք նոցա, եւ այլն: Նոյնպէս եւ իշացուլն, մի կողմն արու մարդոյ է, եւ վայր կողմն իշոյ*»⁹: Այս ամէնից պարզ է դառնում, որ յուշկապարը հայերին ծանօթ է ու բնիկ¹⁰: Գեղարուեստական գրականութեան մէջ յուշկապարիկը հեղինակի կողմից բացատրում է հետեւեալ կերպ. «*Յուշկապարիկ*» են ասում այն կենդանիքը, որոնք կէսից վեր ուրիշ կենդանի են, կէսից վայր՝ ուրիշ: *Օրինակ՝ կան այնպիսի կենդանիք, որոնք զօրկից վերեւ կնկայ նման են, իսկ զօրկից ներքեւ՝ ձկան, թռչունի, իշի եւ այլն*»¹¹:

Ըստ բանահիւսական նիւթերի՝ Հայաստանի տարբեր գաւառներում յուշկապարիկի գոյութեանը հաւատում էին մինչեւ Ի. դարը: Կարելի է ասել, որ ժամանակի ընթացքում յուշկապարիկի առասպելաբանական ընկալումները հետզհետէ թուլանում են, ոգու մասին պատկերացումները փոխում, եւ գրոյցներում այն ներկայանում է արդէն զուտ մարդակերպ՝ զրկուած իր առասպելական խառնածին բնոյթից, կերպարանքից ու գործառոյթից: Նիկոմիդիայի (Իզմիթ) գիւղերում (Արմաշ) յուշկապարիկն ընկալում ու պատ-

⁴ Եսայի 13:21-22, 34:11-14:

⁵ Յուշկապարիկի մասին տե՛ս՝ Հ. Հայրապետեան, «Յուշկապարիկի գաղափարը հայ միջնադարեան հաւատալիքներում», *Լրաբեր հասարակական գիտութիւնների*, 7(571):1990, էջ 53-61:

⁶ Եզնիկ Կողբացի, *Եղծ աղանդոց*, թարգ. եւ ծանօթ.՝ Ա. Աբրահամեան, Երեւանի համալսարանի հրատ., Երեւան, 1994, էջ 80, 309:

⁷ Հայր Ղեւոնդ Ալիշան, *Հայոց հին հաւաքքը կամ հեթանոսական կրօնը*, «Գրիգոր Տաթեւացի» ՍՊԸ, Երեւան, 2002, էջ 99:

⁸ Նոյն:

⁹ Նոյն:

¹⁰ Նոյն:

¹¹ Ղ. Աղայեան, «Արութիւն եւ Մանուէլ, ազգային վէպ», *Երկերի ժողովածու, հտր. 1*, Հայպետհրատ, Երեւան, 1962, էջ 17:

կերացում է որպես հրեշտակ՝ թերատի աղջկայ կամ հարսի կերպարան-
քով: Երիտասարդ տղաները յաճախ էին պատմում գիղերում վերջիններիս
երեւալու եւ նրանց հետ իրենց հանդիպումների մասին:

Լուսադեփրին առջեւ կանգներ էր հարսնուկ մը, ափովը ջուր տուաւ, որ խմեմ:
Նախ ուշադրութիւն չորի, գիղն հիւր եկած քաղքցի կարծեցի: Շրթներս մօտե-
ցուցի, ափին վարդին մէջ բացի, ի՞նչ տեսնեմ,- պճտուն¹² փոքրիկ ողջ աստղ մը,
երկնքի աղջիկներուն նշանը: Ուշաթափ ինկայ: Երբ արթնցայ, անհետացեր էր¹³:

Աստուածաշնչում, Եզնիկ Կողբացու *Եղծ աղանդոցում*, միջնադարեան
բազմաթիւ ձեռագրերում, Ալիշանի *Հին հաւաքը կամ հեթանոսական
կրօնք հայոց* աշխատութիւնում յիշատակուող եւ ջրերին առնչուող համբա-
րու, յուշկապարիկ, պայեր, պարիկներ կոչուող ոգիների մասին հաւատա-
լիքներն ու պատկերացումները չեն հասել մեր օրեր:

Ջրի ոգիներ անուանումը պայմանական է, քանի որ «ջրերի եւ անտառ-
ների ոգիները յաճախ միախառնում են իրար, նաեւ լեռների ոգիների հետ
են առնչում»¹⁴: Այս մասին են վկայում **փերի** բառին հոմանիշ **լեռնակոյս**,
լեռնանուշ¹⁵ բառերը: Մանուկ Աբեղեանի դիտարկմամբ «*հայ ժողովրդա-
կան հաւատալիքներում նման ոգիների հաւաքն արդէն անհետանալու
վրայ է, ուստի երկուսի (ջրերի եւ անտառների ոգիների) միջեւ եղած տար-
բերութիւնը յաճախ կորչում է*»¹⁶: Որպէս ոգիների բնակութեան վայրեր՝ ջրե-
րի ու աղբիւրների կողքին յիշատակում են կանաչ անտառները, հովիտ-
ներն ու մարգագետինները, նաեւ լեռներն ու հին ջրաղացները: Այսինքն,
քննուող ոգիների խումբը երկկենցաղ է եւ մեր քննած զրոյցները փաստում
են այս հանգամանքը:

Երուանդ Լալայեանը Ջաւախքից գրառել է մի շարք զրոյցներ ջրի ոգի-
ների մասին, որոնք բաւականին ծաւալուն են եւ հետաքրքիր նիւթ են տա-
լիս ուսումնասիրութեան համար: Աղեքսանդր Մխիթարեանցը զրոյցներ է
ներկայացնում **հոթոթների**, **ճոճի պառաւների** եւ **հուրի փերիների** մա-
սին: Ջրի պառաւների մասին խօսում է Յովհաննէս Կոստանեանցը¹⁷:

¹² Փայլիլուն:

¹³ Շ. Նարդունի, «Սիրահարութիւն հրեշտակներու հետ», *Հայկաշէն, վարուցան
գրականութեան եւ մշակոյթի, գիրք առաջին*, Փարիզ, 1942, էջ 24:

¹⁴ Մ. Աբեղեան, *Հայ ժողովրդական հավատքը, Երկեր, հպր. է.* Հայկական ՍՍՀ ԳԱ
հրատ., Երևան, 1975, էջ 82:

¹⁵ Աշոտ Սուքիասեան, *Հայոց լեզուի հոմանիշների բացատրական բառարան*, 2րդ
հրատ., ԵՊՀ հրատ., Երեւան, 2009, էջ 1164:

¹⁶ Աբեղեան, *հպր. է.* էջ 82:

¹⁷ Աղեքսանդր Մխիթարեանց, «Փշրանք Շիրակի ամբարներից», *Էմինեան ազգագ-
րական ժողովածու, Ա. հատոր*, Մոսկուա-Ալեքսանդրապոլ, 1901. նաեւ՝ Յովհան-
նէս Կոստանեանց, *Շիրակի լեզենդաններից եւ ժողովրդական կեանքից*, Աղեք-
սանդրապոլ, 1896:

Չրոյցների մէկ-երկու օրինակներ կան պահպանուած Նոր-Նախիջեանի¹⁸, Բորչալուի¹⁹ ազգագրական եւ բանահիւսական նիւթերում: Ջրի ոգիների մասին զրոյցների եզակի նմուշներ է հաղորդում ազգագրագէտ-բանագէտ Յակոբ Չոլաքեանը, որոնք նա գրառել է Միջերկրական ծովի եզերքին տեղակայուած հայաբնակ վայրերից՝ հիմնականում Քեսապի շրջանից²⁰:

Չրոյցների տեղաբաշխուածութիւնը աշխարհագրական առումով մեծ ընդգրկում ունի, սակայն քանակական առումով զրոյցները զիջում են ստորին առասպելաբանութեան մաս կազմող միւս ոգիների մասին առկայ զրոյցներին (սատանա, շոտտ եւն.):

ՓԵՐԻՆԵՐԻ ԱՌԱՋԱՅՈՒՄԸ

Ժողովուրդը փերիներին կամ ջրի ոգիներին, երեակայելով որպէս գեղեցկութեան կատարելատիպ, համարում է, որ նրանք մարդկային ծագում ունեն եւ անիծուած են ի վերուստ՝ Աստծոյ, Քրիստոսի կամ հրեշտակների կողմից: Ալիշանի, Լալայեանի²¹, Բենսէի (Բուլանըխ)²² եւ այլոց գրառումներում փերիների առաջացման առասպելատիպ զրոյցի հիմնական տարածուած մոտիւլը հետեւեալն է.

Երբ Նոյը տապանում էր, նրա որդիներից մէկը չկարողացաւ զգաստ մնալ եւ իր կնոջ անկողինը մտաւ: Այս սիրուց մի աղջիկ ծնուեց: Ջրերն իջնելուց յետոյ Նոյն իր զաւակներով դուրս եկաւ տապանից, իսկ փոքրիկ աղջիկը մնաց այնտեղ: Հրեշտակը Նոյին հարցրեց.

- Տապանում էլ մարդ մնա՞ց:

- Ոչ, - պատասխանեց Նոյը:

- Եթէ մնաց, թող աներեւոյթ լինի:

Փոքրիկ աղջիկն անմիջապէս աներեւոյթ եղաւ ու դարձաւ **փերի**: Այն ժամանակից նա ընկել է աշխարհ, տղամարդկանց քնած ժամին նրանց սէրն է վայելում եւ իր ցեղը բազմացնում²³:

Այսօրինակ զրոյցներում Նոյեան տապանը պայմանականօրէն կարելի է դիտարկել որպէս սրբազան տարածք, որտեղ ի վերուստ պատուիրուած էր

¹⁸ Երուանդ Շահագիզ, «Նոր-Նախիջեանը եւ նորնախիջեանցիք, սնտոհապաշտութիւններ, հաւատալիքներ եւ նախապաշարումներ», *Ազգագրական հանդէս*, գ. IX, Թիֆլիս, 1902, էջ 52-53:

¹⁹ Ե. Լալայեան, *Երկեր, հոր. 3*, ՀՀ ԳԱԱ «Գիտութիւն» հրատ., Երեւան, 2004, էջ 211:

²⁰ Յակոբ Չոլաքեան, «Կասիոս լեռը Անտիոքի շրջանի հայոց աւանդազրոյցներուն եւ հաւատալիքներուն մէջ», *Հայ ժողովրդական մշակոյթ XVII. աւանդականը եւ արդիականը հայոց մշակոյթում*, ՀԱԻ հրատ., Երեւան, 2018, էջ 313-27:

²¹ Ե. Լալայեան, *Երկեր, հոր. 1*, Հայկական ՍՍՀ ԳԱ հրատ., Երեւան, 1983, էջ 229:

²² Բենսէ, «Բուլանըխ կամ Հարք գաւառ, Հաւատք», *Ազգագրական հանդէս*, գ. 2, Թիֆլիս, 1900, էջ 11-12:

²³ Աւետիս Ահարոնեան, «Հայկական հին հաւատալիքները. բարի եւ չար ոգիներ», *Հայրենիք ամսագիր*, 2:1939, էջ 90:

մաքուր մնալ եւ առագաստ չմտնել: Ահա այս արգելքը խախտելու արդիւնք են փերիները՝ «թէ կաս՝ չիք դառնաս» բանաձեւի՝ անէծքի հետեւանք:

Զաւախքում նաեւ պատմում էին. «Քրիստոս օր փասնորդ ժողվէր կը, շատերը լաւ փողոցն ու աղջիկներին պահէին կը, օր ապոնցէն փասանորդ չփան: Օր ժողվեց պրծաւ, փեսաւ օր բիպտուն դարձրվորածներ են, հասկըցաւ թը բանը յոր փեղն է, լաւերը պահեր են, դարձաւ ըսեց թը՝ ալ չկա՛յ: Ըսին թը՝ չէ, չիք: «Թը կա, չիք դառնա» ըսաց Քրիստոսը: Օսահաթ ապ պահվրփածները չիք դառան, աներեւութացան: Տէյմ՝ օր հիմի ա ապոնք կան, կ'ուրեն խմեն, աճին բազմանան կը. եփ օր ա սրտերն ուզէ, մարդոց էրեփն կը»²⁴: Նմանատիպ դիպաշար ունեցող գրոյցներով է բացատրում հուրի փերիների աստուածային գեղեցկութիւն ունենալու հանգամանքը: Մինչեւ օրս էլ գեղեցիկ աղջիկներին բնութագրելիս՝ օգտագործում են հուրի, փերի եւ նմանօրինակ մակդիրներ:

ԶՐԻ ՈԳԻՆԵՐԻ ԱՐՏԱՔԻՆՆ ՈՒ ՅԱՏԿԱՆԻՇԵՐԸ

Ժողովրդական գրոյցներում ջրի ոգիների արտաքինի մասին պատկերացումներն ու նկարագրութիւնները երկհակադիր դրսեւորումներ ունեն: Ինչպէս իրանական, սլաւոնական եւ այլ ժողովուրդների հաւատալիքներում, այնպէս էլ ջրի ոգիների մասին հայկական **առաջին խմբի** գրոյցներում փերիներն ու ջրի աղջիկները պատկերացում են աստուածային գեղեցկութեամբ. «Պոյով, բուսով, շէկ-շէկ մազերը փէյ օփվիցը, ուսերու վրայով բաց ցկած: Հալաւ չունիր, գլխուն մազերը ծածկեր էին սաղ գլովփան: Պիճիլի թուփիկ օփվիքը օր գեփին չէ՛ր դնէ, գիտես թը կանաչ կը բուսնիր փեղը: Թշերը կարմիր՝ մէկ-մէկ խնձոր, ունքերը՝ կամար, աչքերը՝ խոշոր, բերանը՝ պզդիկ, պոկները՝ վարդի թեր, գիտես, թը Աստուած բան չէր ունեցէ, դալամ առեր, ապոր նշխեր էր»²⁵: Զրոյցներում փերիներին նկարագրելիս՝ ժողովուրդը յատուկ ուշադրութեամբ ընդգծում է վերջիններիս գեղեցկութիւնն ամբողջացնող երկու կարեւորագոյն յատկանիշ՝ **կապոյտ աչքերն** ու **շէկ կամ կարմիր մազերը**:

Աչքերը. Փերիների աչքերը սեւ չեն լինում, նրանք միշտ պատկերացում են երկնագոյն աչքերով²⁶: Կրակի կտոր այդ աղջիկների աչքերը «խորունկ ջրերի գոյն»²⁷ ունեն: Ժողովրդի այս համոզմունքը վերաբերում է ոչ միայն փերիներին, այլեւ չար ոգիներին ընդհանրապէս: Օրինակ, չար աչքը, ընկալուելով ու համարուելով չար ոգի, որը 666 (366) հիւանդութիւնների հետ շրջում էր աշխարհով մէկ, պատկերացում էր որպէս շէկ մարդ՝ խաժ (կապոյտ) աչքերով²⁸: Որոշ ազգագրական շրջաններում կապոյտ են նկա-

²⁴ Լալայեան, էջ 229:

²⁵ Նոյն, էջ 228:

²⁶ Ռոզմերի, «Կրօնքի հոգեպաշտական փուլի նշմարներ», *Բիւրակն*, 5:1899, էջ 69:

²⁷ Նարդունի, էջ 22:

²⁸ Արեղեան, էջ 100-1:

րագրում նաեւ սատանաների ու քաջքերի աչքերը: Ատաբազարում *մեզնէ աղէկները* էգ, գեղեցիկ ու սիրուն ոգիներ են, երիտասարդների սիրահար, տղածգաններու թշնամի: Դեղին մազերով, կապոյտ աչքերով եւ սպիտակ այտերով են պատկերացում²⁹:

Կապուտաչեայ մարդկանց՝ չալաղապտուղներին, վերագրելով չար յատկանիշեր, համեմատում կամ նոյնացնում են անմաքուր ուժերի հետ. «Կապուտ աչք ունեցող մարդն էլ սատանա կ'ընի. մարդս պէտք ա էդ տեսակից մուղաթ կենա, չունքի հազար մի ֆանդ ու ֆել կ'ունենա էդ թատուր մարդը: Կապուտ աչքը չար կ'ընի. որ մարդու տա՛ էլ նրա բանը չի աջողի. քարին էլ որ տա, կը տրաքի: Ճամփա գնալիս որ մարդու տեսնի, բարի ճանապարհ ասի՝ էդ մարդուն ճամփին մի փորձանք ռաստ կը գա»³⁰: Հայ ժողովրդական հեքիաթներում ճանապարհ գնացողներին խորհուրդ են տալիս հեռու մնալ կապոյտ (չիւ, չալ, խաժ) աչք ունեցողներից՝ չարից, շահից ու փորձանքից զերծ մնալու համար³¹:

Ըստ ժողովրդական պատկերացումների՝ կապուտաչեայ փերիներն ու չարքերն իրենց զոհ են ընտրում կապուտաչեայ մարդկանց. «Թամարենց մին կապուտ աչքերով հարսը ունին. չարունք էր դպել»³², կամ «Ա՛խ, կապուտ աչքե՛ր, ձեզ ինչ սիրում ա՛ն, ձեզ ինչ սիրում ա՛ն: – Վէ կալան տարան գցան մըն չարաթ Սուրբ Օվանէսի դուռը, էլի նաղարա, զուռնով պար ածան, պար եկաւ, որ լաւացա»³³: Կապուտաչեայ փերիների գեղեցկութեամբ քողարկուած աչքերը որքան գրաւիչ են ու գայթակղիչ, նոյնքան չար են ու նենգամիտ:

Մազերը. ժողովրդական պատկերացումներում փերիները կամ ծովի մարերը յաճախ երեակայում են ջրերին ափամերձ մի քարի վրայ նստած՝ ոսկէ սանրով իրենց գեղեցիկ ու երկար մազերը սանրելիս: Տարբեր գրոյցներում ջրի ոգիների մազերը նկարագրում են որպէս շատ երկար, մինչեւ ոտքերը հասնող, շէկ, կարմիր կամ ոսկէ, հարթ կամ գանգուր: Մազերի փարթամութիւնը ծածկում է նրանց մերկ մարմինը:

Առասպելաբանութեան մէջ մազերը համարում են հոգու ապաստարան, մարդկային էութեան եւ կենսական ուժերի խտացման կէտ³⁴: Եթէ ինչ որ մէկին յաջողութիւն բռնել կամ կտրել մազերից, ապա «փերուն իրենով կ'անի»: «Ծովի մարերն երկարամազ կանանց նման են. նոցա ուժը մազերի մէջ

²⁹ Ռոզմեդի, էջ 69:

³⁰ Տ. Նաասարդեանց, *Հայ ժողովրդական հեքիաթներ, եօթներորդ գիրք*, Թիֆլիս, 1891, էջ 27-28:

³¹ «Զիլ ու Քեոսէ», *Հայ ժողովրդական հեքիաթներ, հտր. XVI, Վասպուրական, ՀՀ ԳԱԱ «Գիտութիւն» հրատ.*, Երեւան, 2009, էջ 366:

³² Նաասարդեանց, էջ 27:

³³ Նոյն:

³⁴ Լ. Մկրտումեան, «Հայոց հրաշապատում հեքիաթի մի հերոսի վերլուծութեան փորձ», *Բանբեր Երեւանի համալսարանի*, 1(139):2013, էջ 25:

է: Եթէ նոցա մագերը կտրես, նոքա քեզ գերի կը լինին եւ զանազան ծառայութիւններ կ'անեն»³⁵:

Սատանաների մասին նմանատիպ դիպաշարով մի գրոյց հաղորդում է Լալայեանը՝ Բորչալուից, որտեղ տանտէրը սատանային հպատակեցնում է իրեն՝ մագերից մի փունջ կտրելով: Եօթ տարի ծառայելուց յետոյ՝ սատանային է վերադարձում իր մագափունջը, եւ վերջինս անհետանում է³⁶: Պատահական չէ նաեւ, որ սատանաների սիրելի զբաղմունքը՝ ախտոներում ձիերի բաշը հիւսելը, նոյնպէս կապում է մագի հետ:

Ջրի ոգիների մասին գրոյցների **Երկրորդ խմբում** գործ ունենք իրենց գեղեցկութիւնից գրկուած փերիների հետ: Չար բնաւորութեան պատճառով, օրինակ, **«հնարքները կորցնում են իրենց կուսական գեղեցկութիւնը եւ արդէն հանդէս են գալիս իբրեւ ջրի պառաւ կամ չար ոգիներին նմանուող էակներ»**³⁷: Շիրակեան գրոյցներում ջրի ոգիները առաւելապէս տգեղ ու կեղտոտ արտաքին ունեն: **«Հոթոթները սաւրանի պէս են, հմա սաւրանա չեն, ըդոնց հըմար Եարդէն քեռին կըսէր, թէ ծմեռ, գարուն չայերու եա ճիմ-ճիմոց մէջը կըբնակուին: Գոմէշը ինչպէս որ տիւ մէջ կը թապլտի ու չամ-ռակոյլով էղած դուրս կուգա, էնպէս էլ հոթոթները ուրքէ գլոխ սեւ չամոռով ծեփած են, աչք, էրես, քիթ, պոռնկ տիւ մէջ չի երեւա»**³⁸: Նոյն միջավայրում են պատկերացում նաեւ **ճոճի պառաւները**՝ անճոռնի ու տգեղ արտաքինի նկարագրութեամբ. **«Չպլաղ, հաստ ու չաղ պառաւ էր. գլուխը բաղնըքի ղուբէն քեզի օրինակ. ծծերը էնքան մենծ էին, ինչո՞ր դօշին մէկ-մէկ գառ կապես... ընտրու գետրա էլ ուր ու ձեռն էր...»**: Ասում են, թէ ամէն պատահածի բռնում, ներս են քաշում՝ մարդ թէ կենդանի³⁹:

ՋՐԻ ՈԳԻՆԵՐԻ ԳՈՐԾԱՌՈՅԹՆԵՐԸ

Քննուող երկու խումբ ջրի ոգիներն ունեն գործառութային միեւնոյն նշանակութիւնը: Իգական սեռին պատկանող այս ոգիները սիրայօժար կամ բռնի ճանապարհով սիրային կապի մէջ են մտնում տղամարդկանց հետ՝ իրենց ցեղը բազմացնելու նպատակով: Ի տարբերութիւն կնոջ ու սատանայի սեռական կապի, որը հիմնականում լինում է «անհետեւանք», յաճախ փերիների եւ տղամարդկանց կապերն աւարտում են որդեծնութեամբ: **«Չարոց ըրիսէն խսանից կ'ընի: Իսանին խաբում ան, սաւրանախաբ ան գցում, խսանից ըրիսայ ա ընում. հըմա հըմէն էգ ան ընում, - չարոց ործը չ'ինի»**⁴⁰:

³⁵ Շահագիգ, էջ 52-53:

³⁶ Ե. Լալայեան, *Երկեր, հպր. 3*, ՀՀ ԳԱԱ «Գիտութիւն» հրատ., Երեւան, 2004, էջ 210:

³⁷ Արեղեան, էջ 84:

³⁸ Մխիթարեանց, էջ 171:

³⁹ Նոյն, էջ 171-172:

⁴⁰ Նաւասարդեանց, էջ 29:

Առաջին խմբին պատկանող ոգիները՝ հուրի փերիները կամ յաւերժահարսները, ժողովրդական բնութագրմամբ ապրում են ուրախ ու թեթեւաբարոյ կեանքով: Լուսաստղի կամ լուսնի լոյսը տեսնելուն պէս (մինչեւ արեւածագը)՝ նրանք դուրս են գալիս «որսի»: «Կանանց հանդերձներով գնում են գիւղ եւ առանց յայտնելու, թէ փերի ղզի են, ապրում են մի երիտասարդի հետ, որից եւ ունենում են որդիներ»⁴¹, կամ իրենց գեղեցկութեամբ հրապուրում են տղամարդկանց, տանում իրենց «եղնաղի» մէջ, քաշում ջրի տակ: Իրենց ընտրեալների հետ փերի ղզիներն ապրում են ստորջրեայ ապարանքներում եւ վայելում իրենց անտակ հարստութիւնը: Տուն վերադառնալ ցանկացող տղամարդկանց կաշառում են ոսկով, արծաթով ու ակնեղէնով, թողնում են գնալ՝ վերադառնալու եւ իրենց մասին չբարձրաձայնելու պայմանով: Խոստումը դրժողները պատժում են. զրկում են ապրուստից, հիւանդանում են, սկսում են հիւծուել եւ, ի վերջոյ, մահանալ:

Քուրտ բանահիւսական նիւթերում հուրի փերիները նոյնպէս հանդէս են գալիս մարդկային կերպարանքով, ամուսնանում տղամարդկանց հետ⁴²:

Ի տարբերութիւն փերիների ու յաւերժահարսների՝ ոգիների միւս խումբը ունի չարութեան ատելի ընդգծուած յատկանիշեր: Ապրելով բացառապէս տղմոտ ջրերում՝ «թաքնւում են կամուրջների տակ, եւ երբ որեւէ մէկը մուծ ժամանակ դրանց վրայով քայլի, նրան եւ մանաւանդ երեխաներին՝ քաշում են ջրի մէջ»⁴³:

Ասում են, թէ կամուրջի տակ ջրի պառաւ է կենում,
Եւ միշտ մթնով անցկենողին ջրի տակն է գլորում,
Դորա համար իմ հանգուցեալ մամս երբեք գիշերով
Անց չէր կենում ջրի կամուրջ, այլ գնում էր ցերեկով:

Նա ասում էր՝ շատ-շատերը զոհ են գնում պառաւին,
Գրողը տարած չար պառաւը շատ է խեղդում փոքրերին,
Բայց ես չանցայ այդ կամուրջով, այլ եզերքից ջուր առայ,
Եւ հագիւհագ մեծ սարսափով ահ ու դողով տուն ընկայ...⁴⁴:

Որպէսզի երեխաները միայնակ չգնային գետը լողալու, կամ նոյնիսկ չանցնէին գետի կողքով՝ մոկսեցի կանայք վախեցնում էին **գետի պառաւով**: Հաւատացնում էին երեխաներին, որ վերջինս ունի «մի երկար խաց-խան»⁴⁵: Երբ երեխաները էրթան գետի մօտ, նա իր խացխանի կեռը գցում է, երեխային քաշում տանում գետի մէջ ու խեղդում⁴⁶: Յ. Դուրբախեանի հաղորդած զրոյցում մայրը իր՝ գետում լողալ ցանկացող որդուն սաստում

⁴¹ Լալաեան, *Երկեր, հոր. 1*, էջ 229:

⁴² Ա. Աւդալ, *Եզդի քրդերի հավատալիքները*, Երեւան, 2006, էջ 51:

⁴³ Արեղեան, էջ 83:

⁴⁴ Կոստանեանց, էջ 75:

⁴⁵ Հացիան.- ակիշ, լաւաշը թոնրից հանելու յարմարանք՝ կեռ գլխիկով:

⁴⁶ Ա. Դուրբախեան, «Մոկսի ազգագրական եւ բանահիւսական նիւթեր», Երեւան, 1960, ՀԱԻ արխիւ, ձեռագիր, մաս 5, թերթ 118:

է՛ ասելով, թէ «ծովի մայրն իր երկար մազերի մէջ փաթաթելով՝ քեզ գետի յայրակը կը տանի, կը խեղդի եւ կ'ուտի»⁴⁷:

Ժողովրդական գրոյցներում երեակայում են եւ տղամարդ փերիներ, որոնք սովորաբար ամուսնանում են փերի ղզինների հետ: Սակայն միքանիսը, բացառութիւն կազմելով, մարդկանց հանդերձներով գալիս են գիւղ, ամուսնանում գեղեցիկ աղջկայ հետ եւ միասին ապրում: Կանայք հաւատարիմ են լինում նրանց, քանի որ չգիտեն, թէ նրանք փերի են, բայց երբ իմանում են, ամէն կերպ աշխատում են սպանել նրանց՝ այրելով թոնրի մէջը:

Այս մասին է վկայում հետեւեալ գրոյցը.

Վախտովմ՝ մէ լուսի կտոր աղջիկմ՝ ջուրը էրթցած վախտը ամէն անգամ տեսնի կը մէ ըռնտիկ տղամ՝ աղբրի քարին նստած: Մեմ՝ էրկուս, ասոնք իրար վրա սէր կապեն կը: Իրեք տարի սէր քաշելէն ետեւ պսակվին կը: Գիշերը եփ օր տղան ձեռքը աղջկա վրա կը դնէ, աղջկա ջանը դող գելլէ. գիտես թը փշերը ծակծկեն կը: Մէ օրմ՝ ա տղան լողանալու գլլի, աղջիկը դռն ծակէն կաշէ: Կաշէ, մեմ՝ ա տեսնի կ՝ օր տղան բիրտան օձ դառաւ, օլրվաւ, բաթաթ կտռաւ: Լողացաւ, լողացաւ, կենա նորէն մարդ դառաւ: Աղջիկը վախենա, վազգէ դրկցի կնկանը պատմէ կը: Ան ա կըսէ կը թը՝ կա չկա՝ ասիկ փերի է, կրնաս նէ՝ ցկէ՝ թնդիր վառէ, թըչը՝ քեզի ազատում չկա: Աղջիկը գուգա տուն, մէկալ օրը հաց էփած տեղը յարանութնով մարդուն կանչե կը քովը: Մեմ՝ ա մէ հացմ՝ կուտ ցկէ կ՝ ու մարդուն կըսէ թը՝ կախվի հանէ: Ան միամիտ կախվի կը թնդիր թը չը՝ ասիկ օտվներէն բռնէ շրջէ կը թնդիր ու խոնչան կորգէ կը բերնին, ինքն ա թողնէ փախչի կը: Քիչմ՝ էտեւ գուգան կաշեն օր փերին վառեր մոխիր է կռռէ:

Լալայեանը, խօսելով հայկական հեքիաթներում ջրի ոգիների առկայութեան մասին, գրում է.

Փերի ղզինների մասին պատմում է նաեւ հեքիաթների մէջ, ուր ասում է, թէ նրանք երեւում են որպէս մի անպիտան գորտ, հաստ գաւազան (կոպալ), ափսէ եւ այլն: Մի առ ժամանակ սրանք այս կերպարանքով մնում են եւ փորձում, թէ նախագգալով յարգում են իրենց եւ այդ դրույթան մէջ: Եւ երբ փոքր ինչ յարգանք են վայելում, ծածկաբար մարդու կերպարանք են ընդունում, տունը աւելում, մաքրում, կերակուրն եփում եւ ապա նորից կերպարանքափոխում ու պահ մտնում: Այսպէս նրանք շարունակում են, մինչեւ որ մարդիկ զարմացած դարան են մտնում եւ նրանց բռնում⁴⁸:

Ժողովրդական առասպելատիպ գրոյցներ կան հայկական լեռնաշխարհի լճերի մասին, որոնք փոքր-ինչ տարբերում են փերիների մասին պատմուող գրոյցներից: Այստեղ փերիների հետ հանդէս են գալիս ջրում ապրող կենդանիներ՝ ձիեր, զոմէշներ են.: Այդ գրոյցներից ամենաակնառուն այն էր, որ Առճակու ծովում ապրում են մի հրեղէն տղամարդ, մի հրեղէն կին եւ

⁴⁷ Յ. Դուրբախեան, «Ծերունի Սարգսի յիշատակարանը», *Աղբիւր, միամսեայ պատկերազարդ հրապարակութիւն երեխաների եւ դաստիարակների համար*, չորրորդ տարի, Ապրիլ, 4:1886, Թիֆլիզ, էջ 167-68:

⁴⁸ Լալայեան, *Երկեր, հրք. 1*, էջ 231-32:

մի հրեղէն ձի: Նոյնիսկ հաւատացողներ կային, որ հրեղէն ձիու խրխինջը «շատ-շատերը լսել են»: Հրեղէն ձիուն «տեսնողներ էլ էին եղել»: Սակայն հրեղէն մարդուն ու հրեղէն կնոջը «տեսնողներ» չէին եղել, բայց այդ փաստը մազաչափ անգամ չէր խախտել հաւատը նրանց գոյութեան նկատմամբ⁴⁹: Պատմում էին, որ Սեւանայ լճում կան հրեղէն ձիեր եւ գոմէշներ, որոնք երբեմն դուրս են գալիս, զուգադուրս գամբիկներին եւ հասուն գոմշաձագերին, որոնցից հրեղէն սերունդ էր ստացւում: Ըստ նրանց՝ ճահճուտների վրայ քայլելը վտանգաւոր է, քանի որ նրա տմտմացող ծածկոյթի տակ չարքեր են ապրում, որոնք կարող են մարդուն ներս քաշելով՝ խեղդել⁵⁰:

Ամբողջացնելով հայկական գրոյցներում ջրի ոգիների մասին պատկերացումներն ու առանձնայատկութիւնները՝ կարելի է ասել, որ քննուող խմբի ոգիներն իրենց բնոյթով երկկենցաղ են, ապրում են թէ՛ ջրում եւ թէ՛ ցամաքում: Զրոյցներում խնդրոյ առարկայ ոգիների արտաքինը եւ գործառոյթները ներկայացւում են երկհակադիր դրսեւորումներով: Չնաշխարհիկ գեղեցկութեան տէր փերիները տարփոգիներ են, իսկ տգեղ ու անճոռնի ջրի պառուներն ունեն չարքերին բնորոշ բոլոր յատկանիշերը: Երկրորդ խմբի մէջ մտնող ջրի ոգիներին կարելի է դասել նաեւ մայրերի կողմից յօրինուած մանկասաստ ոգիների շարքին:

AN EXAMINATION OF THE TYPOLOGY AND FUNCTION OF MERMAIDS (BASED ON ARMENIAN FOLK TALES)

(Summary)

HASMIK GALSTYAN (hasmikgalstyan1979@gmail.com)

The popular stories about mermaids constitute a distinct group in the Armenian mythology of the underground and have their parallels in the beliefs of several nations of the world. Such popular stories are not high in number, though they are geographically quite widespread. The prototypes of the mermaids mentioned in written sources of the 1850s-early 1900s are found in the Bible as well as in the works of fifth century Armenian historiographers.

In the Armenian tales these mermaids are amphibious; they live both in water and on land. They are identified as two different characters: a) ugly, monstrous water witches, b) fairies of virgin beauty. The basic function of the first group is to hurt humans and children and cause them vital damage. The second group of mermaids distracts, seduces and misleads men to increase the number of their kind.

The tales describe the matchless beauty of the fairies and particularly single out their blue eyes and blond hair, which are interesting and warrant significant attention from the mythological perspective.

⁴⁹ Ս. Աազեան, «Արճակ», *Հայ ազգագրութիւն եւ բանահիւստութիւն, նիւթեր եւ ուսումնասիրութիւններ*, հրդ. 8, Հայկական ՍՍՀ ԳԱ հրատ., Երեւան, 1978, էջ 110:

⁵⁰ Մ. Ասատրեան, *Արծուանիստ*, «Լուսաբաց հրատ.», Երեւան, 2006, էջ 296: